



14-04-2023

UPA 2023/142

Naqqiut

Naqqiut 10. marts 2023-meersoq taarserpaa.

Naqqiummi siunnersuuteqartoq taarserneqarpoq, siunnersuuteqartutut allaqqasimasoq: Inatsisartunut ilaasortaq Anna Wangenheim, Demokraatit

Imatut taarserlugu:

Demokraatit Inatsisartut gruppia

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalagaaffimmiit akisussaaffiit sorliit pitsaasumik angerlaanneqarsinnaanerinik allattorsimaffimmik imaqartumik Naalakkersuisut nalunaarusiussasut peqquneqarnissaanik Inatsisartunut siunnersuut. Nalunaarusiaq akisussaaffiit angerlaanneqartussat tamarmik immikkut aningaasatigut kingunissaanik imaqassapput taamatullu akisussaaffiit angerlaanneqarnissaannut tigussaasumik piffissalersorlugit. Nalunaarusiaq piareereersimassaaq Inatsisartunullu tunniunneqareersimassalluni UKA2024 nallertinnagu.

(Demokraatit Inatsisartut gruppia)

Tunngavilersuut

Namminersornerulerneq piffissanngorpallu namminersulivinnissaq nammineerluni takkunnaviangilaq. Sapiissuseqartoqartariaqarpoq, sulilluartoqartariaqarpoq aammalu sakkortuumik pingaarnerisuiisoqartariaqarluni.

Namminersorneq pillugu inatsit malillugu akisussaaffinnik angerlaassitilluta Danmarkimiit tapiissutigineqartartunik aningaasanik malitseqartussaangillat. Imatut isumaqarpoq, akisussaaffik angerlaassarput qanoq aningaasalersussanerlugu nammineq ujartuissaagut.

Tamanna tunngavigalugu akisussaaffinnik angerlaassinnginnitsinni aningaasatigut kingunissaat paaseqqaassallugit nalunnginnissaat pingaartikkipput.

Aningaasatigut kingunissat eqqarsaatigereerlugit Naalagaaffimmiit akisussaaffinnik angerlaassuinissarput aallartinnissaa Demokraatiniit pingaartutut isigaarput. Eqqaamassavarput akisussaaffinnik angerlaassuinerit tamarmik nammineq oqartussaanerulernissatsinnut annertusaassammata, politikikkullu namminiilivinnissatsinnut tamanna aqqutissiuussissalluni.

Nammineq oqartussaassuseqarnerulernissarput partiit amerlanerit isumaqatigiissutigaat. Kisiannili soorlu akisussaaffinnik angerlaassuinissaq ernumagineqartoq. Immaqaana ilaatigut peqqinnissaqarfik aammalu ineqarneq sukkavallaamik aammalu ajorpallaamik inissisimasut, ullumikkullu sulii ajornartorsiutaasut, angerlaannikuusimani peqqutaasoq. Tamanna tunngavigalugu naalagaaffimmiit akisussaaffinnik angerlaassuilinnginnitsinni peqqissaartumik ingerlanissaa pingaaruteqarpoq.



Tamannalu tunngavigalugu innuttaasut pisinnaatitaaffii nunallu aningaasaqarnera ataqqillugit akisussaaffinnik angerlaassuineq qanoq qularnaatsumik ingerlasinnaanera pillugu nalunaarusiortoqarnissaa Demokraatiniit pingaaruteqarluinnartoq isumaqarfigaarput.

Akisussaaffiit aningaasarsiorfiusut aningaasartuuteqarfiginnginnerpaasassagullu siulliunnissaat aallarniutigisinnaagutsigu isumatusaarnerpaassaaq pitsaanerpaallunilu. Nalunaarusiaq siunnersuutigisara akisussaaffiit sorliit angerlaateqqaarsinnaanerigut ersarissaassooq.

Naalackersuisut partiillu sinnerisa siunnersuutinnut qanoq isumaqarnersut tusarfigissallugit qilanaaraara siammasissumillu ilalerneqarnissara kisaatigalugu.

Pisortanut aningaasatigut allaffissornikkullu kingunissai

Nalunaarusiamik suliaqarneq atorfillip ukiumut suliarisartagai qaangernissaat naatsorsuutigineqanngilaq.

Namminersorlutik inuussutissarsiuteqartunut aningaasatigut allaffissornikkullu kingunissai

Nalunaarusiornermi soqanngilaq.

Innuttaasunut aningaasatigut allaffissornikkullu kingunissai

Nalunaarusiornermi soqanngilaq.